

# Wildwest up uns Straten

**V**erleden Week was ik mit Radd in de Stadt unnerwegens. Daarbi hebb ik mi anfangs wunnert, dat haast an elke Krüzung un Strateneck en Frau of Mann stunn, de en Schriebblock in de Hand hull un sük Notizen mook. Dat daar Schoolkinner be luurt wurren un prüüft wurr, wo se sük as Raddfahrrers in de Stratenverkehr verhollen, is mi eerst lateren upfallen.

Verkehrsunnerricht in Scholen is na mien Mienen för Kinner leep wichtig. Dat markt een weer besünners, wenn 'n mit de egen Kinds kinner unnerwegens is un sücht, wo unseker se tiedwies sünd un wo unverwacht, blauogd un gefahrlecht se menigmaal reageren. Waar söl en se anners lehren, wo man sük richtig verhollen mutt, um neet in Bredullje to kumen un ok um keen anner to schaden?

Man wat bringt de beste Unnerricht, wenn de Kinner Dag för Dag van de Groten vörmaakt word, wo

man sük jüst neet verhollen dürt? Na middlerwiel veerunveertig Jahr as Autofahrrer krieg ik nämlich alltied mehr dat Gefühl, dat sük bi de Deelnemers an de Stratenverkehr dat Klima unneranner ännert hett.

Meestieds tellt schienbaar blot noch: Elk för sük un keen för de anner. Sünd denn de eenfachste Vörschriften un Regels, de wi all wiss in de Fahrschool lehren müssen, neet mehr för elk un een gültig? Wo anners kann ik mi, un besünners Kinner un ollerde Lüü verklaren, dat se lever neet glik up de Fahrbaan stappen, ok wenn hör de Footgängerampel al gröön anwiest? Denn so faak is to beogen, dat Autos un Motorraden, de bi geel mackelk noch anhollen kunnen, eenfach tofahren un deelwies sogaar bi rood noch Gas geven word. Moodwillig, un neet ut Versehen!

Dat gifft noch vööl anner Bispölen, dit is blot en lüttje Utwahl: Autos, de örnlik in en Slang vör en Ampel wachten un liekut fahren wölen, worden eenfach van annern, de egentlik ofbugen müssen, rechts overhaalt, sneden un mutten up de token Ampelphase

## KOLUMNE

Moin, Moin  
**Schrievers** moje  
allerbest hoop  
Pläseer **Spraak** Vertellsel  
Smüstern

## Platt maakt

wachten, wiel de Krüzung weer van all Sieden dicht sett is. Motorraden naihen in hoge Tempo up de Landstraat noch an een vörbi, ok wenn man al lang de Blinker sett hett un ofbugen will. Raddfahrrers fahren neet up de Fahrbaan un geern ok maal up de verkehrte Stratensied. Anhollen an de Ampel is ok hier neet elk sien Möög. Pizza-Taxis jagen vööl to fell dör de Straten un Paketboden rasen, um Tied to winnen, up drie Raden dör de Kurven. Of de overhoopt weten, wat Tempo fievtig un dartig för 'n Bedüden hett?

Mutt man dat vandaag as normaal beteken? Mutt ik amenn mien egen Verhollen ok overdenken un ännern, mien Weten in Saken Stratenverkehr upfrischen laten? Nee, ik glööv, better neet!



Karlheinz Harms